



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

გაბაასება

გაბაასება, დიალოგის ფორმით დაწერილი თხზულება, რ-შიც საპირისპირო შეხედულებანი ხშირად კამათის ფორმით არის გადმოცემული. საკუთარი უპირატესობის დამტკიცების მიზნით მოკამათენი ცდილობენ მოწინააღმდეგის შეხედულებათა გაბათილებას. გ-ის ავტორი უმეტესად არ ამჟღავნებს თავის პოზიციას, თუმცა ზოგჯერ მაინც ჩანს, ვის ანიჭებს უპირატესობას.

გ-ის პირველი ნიმუშები გვხვდება ანტ. ლიტ-რაში. გ. პოპულარული იყო შუა საუკ. აღმოსავლურ და დასავლურ ლიტ-რაში (არაბ.-სპარს. მუნაზარე, პროვანსული ტენცონა, ფრანგ. დებატი, რუს. პრენია და სხვ.). ამ ჟანრის თხზულებებში აისახებოდა ეპოქის ეთიკურ-ესთეტიკ. და სოც.-პოლიტიკ. შეხედულებები. გ. საქართველოში ძველთაგანვე ყოფილა ცნობილი, რაც დასტურდება ხალხ. სიტყვიერების მასალებით (ლექსები „სიკვდილისა და კაცის გაბაასება“, „ცა და ქვეყნის ბაასი“, „ქალ-ვაჟის გასაუბრება“ და სხვ.).

ქართ. მწერლობაში გ-ის ჩვენამდე მოღწეული პირველი ნიმუშია სერაპიონ სოგრატის ძე *საბაშვილის* მიერ გალექსილ „როსტომიანში“ ჩართული სამსტროფიანი პაექრობა, რ-შიც ერთმანეთს ეკამათებიან ავტორი, შოთა რუსთაველი და ბაგრატ მუხრანბატონი. გ-ის ჟანრმა განსაკუთრებული პოპულარობა მოიპოვა ე. წ. ალორძინების ხანაში – XVII-XVIII სს-ში; გ-ის სინონიმებად იხმარებოდა შედარება, ცილობა, შელაპარაკება, გაბტობა. ქართ. ლიტ-რაში გ-ის დამამკვიდრებლად მიჩნეულია *თეიმურაზ I*. გ-ის მნიშვნელოვანი ნიმუშები აქვთ *არჩილ II-ს*, *თეიმურაზ II-ს*, დ. *გურამშვილს*, *მანანას* და სხვ. მათი თხზულებანი ღრმა იდეური შინაარსის შემცველია და ასახავს ეპოქის სულისკვეთებას.

ლიტ.: ქ ი ქ ო ძ ე ბ., გაბაასება ძველ ქართულ ლიტერატურაში, ბათ., 1952.

მ.
გუგუშვილი
